

東
華
續
錄

東華續錄

道光四十

臣王先謙敬編

臣周瀾蕃恭校

秋七月乙未諭前據刑部奏審明孫三等並無放火情事與景綸等原奏不符當降旨將原審草率之郎中枚功等及率行具奏之景綸等交該衙門嚴加議處本日據各衙門查例覆奏朕詳加披閱吏兵二部所議甚不允協此案景陵茶膳餽房先後失火事閱八年之久如將縱火要犯訪獲究辦一經審實應卽擬斬景綸等卽訪有形迹可疑之人宜如何細心研究務得確據乃輒挾其成見有意邀功率令承審司員任意熬審刑倡誘供該司員等復敢迎合上司有心鍛鍊若非刑部據實平反豈不釀成冤獄景綸有麟均著照宗人府所議革去公爵容照聯名具奏厥罪惟均

著一併革去子爵所遺之爵著該衙門照例辦理工部郎中候補
理事官宗室牧功兵部郎中國隆阿禮部員外郎華封內務府郎
中博啓通額承審要案迎合見好幾致陷人重辟非尋常承審不
實可比部議降調實屬輕縱牧功國隆阿華封博啓通額均著卽
行革職遵化州知州袁正林隨同覆訊亦有應得之咎惟先因案
無憑據礙難懸揣究已備文申詳與牧功等尙屬有聞著加恩改
爲革職留任吏兵二部堂官於特旨嚴議之案並不將全案情節
及誤入罪名詳細覆議率以尙未成招一語巧爲開脫實屬糊塗
不曉事體著交各衙門照例議處○丁酉以左副都御史鄂爾端
爲泰甯鎮總兵官○丙午命周天爵等查卹兩湖水災○辛亥以
溥洵爲左副都御史候補三品京堂○乙卯諭喀什噶爾等四處歲貢改
爲閒二年一次○辛酉周天爵奏報任事謝恩得旨卿之果敢從

公朕所素知兩湖一切政務次第認真整頓可也○以奕毓爲內閣學士兼禮部侍郎銜由光祿寺卿遷○王戊趙盛奎以病免以王瑋慶署刑部右侍郎由禮部右侍郎兼署○是月給湖南華容縣水災口糧

八月庚午以經額布爲成都將軍托渾布爲山東巡撫調陸費琅爲直隸布政使以王惟誠爲廣西布政使孫善寶爲雲南按察使

由直隸勳昌道遷

○庚辰林則徐等奏洋船遷延不去希冀在澳門交易

並欲偷賣新來鴉片更於毆斃民人之案不將兇手交出見在禁絕柴米食物撤其買辦工人上諭令悉心商酌相度機勢籌畫盡善○癸未改陝西平利縣白土營左哨千總爲城守營千總○是月給陝西葭州等三州縣被災口糧並緩徵華州等七州廳縣額賦

九月乙未以卞士雲爲湖南布政使文冲爲湖北按察使

由直隸永定河

道○丁酉諭據林則徐等奏巡閱澳門抽查華夷戶口情形一摺
澳門爲夷商聚集之所夷樓屯貯煙土久成弊藪乘此查辦之時
必當於該處先清其源方爲盡善該大臣等既委該地方官查明
戶口復由香山統領將備整隊出關宣布恩威申明禁令並查洋
樓見無存貯煙土辦理甚屬妥協惟該處華夷叢雜保甲難施且
由同知縣丞每歲編查恐有名無實易滋流弊至督撫兩司分年
輪往抽查之處亦涉煩瑣其應如何立定章程以清弊竇而垂久
遠著該大臣等另行妥議具奏○林則徐等奏英人以乞食爲名
先放火礮經參將賴恩爵施放火礮擊翻洋船轟斃多名復經守
備黃琮拋擲火藥焚毀船隻我兵奮勇大挫其鋒該領事義律浼
西洋夷目懇求轉圜仍命相度機宜辦理○辛丑 上閱健銳營
兵○丙午諭容照前因案革職並將所襲子爵斥革其所遺之爵

著該衙門照例辦理茲據該旗奏稱查明那彥成之子容安曾因貽誤軍機問擬死罪容恩亦因私改例文獲咎褫職該兩支名下均不宜承襲應將襲爵敕書繳銷等語那彥成在嘉慶年間滑縣軍營著有勞績仰蒙 皇考仁宗睿皇帝賞給子爵俾伊世襲乃伊子容安等所獲之咎均屬難追本應照例停止以昭懲戒姑念那彥成從前懋著軍功渥承 寵眷容照雖已獲咎尙無賊私劣迹所遺子爵著該旗於年終將容照之子二人帶領引見候旨○戊申調李振祐爲倉場侍郎祁窩藻爲吏部右侍郎轉吳其藩爲戶部左侍郎調王瑋慶爲戶部右侍郎以黃爵滋爲禮部右侍郎

由通政使遷

○癸丑諭馬蘭鎮標左右兩營管理

東陵風水地方向

係分爲八段按年輪派千把總一員經制外委一員專責防守前經容照奏准做照秦甯鎮章程按千把總額數分爲十五段各管

各汛茲據琦琛奏稱自改爲分汛各管之後員弁兵丁各分畛域
諸多窒礙難行亦於巡防無益自係實在情形著照所請即將馬
蘭鎮左右營所管地方並各處要口仍改歸舊制按年輪派千把
總經制外委在彼駐守防護以專責成該總兵仍當嚴飭所屬各
官認真督率實力巡防如有懈玩立即懲辦以重防守而收實效
○乙卯林則徐等奏接查洋船出具切結並勒限將空薙驅逐回
國○戊午貝勒奕綺緣事奪爵○壬戌諭鄧廷楨奏查緝鴉片三
載於茲刁狡豪猾之徒本厚利豐一經確訪嚴拏已獲者刑僇及
身未獲者通逃亡命身家旣失怨讟遂興始而風影訛傳繼且歌
謠遠播以查拏爲希旨以掩捕爲貪功以偵緝爲詭謀以推鞠爲
酷罰甚至誣以納賄目爲營私譏廷議爲急於理財嘗新例爲輕
於改律種種狂悖無非爲煙匪洩忿等語朕因鴉片煙流毒傳染

貽害生民特派林則徐會同鄧廷楨等嚴行懲辦以挽頽風乃該匪徒等輒因查拏嚴切肆行詆毀深堪憤恨前於道光十六年開曾經降旨以爲此等鬼蜮伎倆實與匿名揭帖無異飭令各直省大吏遇有傳播歌謠密拏懲治乃申諭未久該匪徒等竟復藐法作奸阻撓新令若不亟加懲辦何以儆狡猾而息刁風況林則徐鄧廷楨怡良等皆朕親信大臣畀以重任見在查辦鴉片正在喫緊之時斷不可因羣言淆惑稍形懈弛林則徐等務當協力同心勉益加勉嚴飭所屬明查暗訪將編造歌謠之人拏獲到案訊明起自何人有無授意主使從重定擬治罪毋稍疏縱○是月緣徵奉天復州廣甯二州縣水旱災額賦

冬十月丙寅諭向例各直省地方官朔望宣講 聖諭廣訓俾鄉曲愚民皆知嚮善良法美意允宜永遠遵行惟州縣地方遼闊宜

講仍慮未周嗣後各學政到任卽恭書刊刻頒行各學生童令人得以誦習並著翰林院敬謹推闡聖諭內黜異端以崇正學一條擬撰有韻之文進呈候朕欽定飭各學政一併恭書徧頒鄉塾俾民間童年誦習潛移默化以敦風俗而正人心○丁卯以四川越嶲馬邊等廳距省遙遠命提鎮等各就所轄按期分駐巡防○甲戌命考試蒙古筆帖式一體先較馬步射著爲令○山西巡撫申啓賢卒予祭葬如尙書例諡文恪賞其子承祖主事以楊國楨爲山西巡撫署刑部右侍郎○丁丑李宗傳以病免以孫善寶爲湖北布政使費開綬爲雲南按察使由浙江鹽運使遷○癸未命嗣後滿洲京堂缺出科道到班題請簡放者改由吏部引見著爲令○甲申林則徐等奏英國躉船駛出老萬山回國空船二十三隻均經驅逐淨盡並遵式取具切結○壬辰頒欽定黜異端以崇正學四言

韻文○是月賑安徽無爲等十一州縣及屯坐各衛水災加賑湖北黃梅等三縣災民給湖北沔陽等九州縣山東蒙陰縣陝西府谷神木二縣湖南華容縣岳州衛水災旱災口糧蠲緩安徽無爲等三十二州縣湖北沔陽等二十六州縣河南睢州等二十一州縣湖南澧州等九州縣衛水災新舊額賦緩徵直隸安州等二十九州縣山東濟甯等三十八州縣衛陝西葭州等五州縣甯古塔三姓旗民被災新舊額賦

十一月甲午諭前降旨將越南國二年一貢改爲四年遣使朝貢一次以昭體恤茲據禮部奏稱該國王以四年例貢品數應否照舊遵辦咨部請示該部請照兩貢併進之數減半呈進並擬單呈覽越南國向例每屆四年兩貢併進今既改爲四年一貢所進貢物自應減去一次其舊例兩貢併進之處著卽停止用示朕綏懷

藩服之意○庚子諭內務府大臣等向來欽安殿當差之首領太監等每年正月二月八月九月十月十二月均有辦道場之期每月又有拜斗之日朕思該太監等供役內庭原爲灑掃殿宇差使嗣後該處首領太監在欽安殿辦道場及拜斗等事著永遠停止其八月初十日傳進光明殿法官道眾在欽安殿辦道場及十二日在順貞門外搭臺舉走香鐙之處亦著停止至圓明園佛樓慈雲普護舍衛城永日堂廣育宮關帝廟法慧寺河神廟亦俱有首領太監充當僧人上殿念經等事著一併裁撤該首領太監等均著留髮當差有年老不願留髮者聽其在原處當差終身而止亦不必上殿念經至佛樓念經之幼僧十三名道童十名原係由外廟撥來著全行撤出仍令歸廟由內務府妥爲安置其每年傳進外廟僧官在佛樓念經等日亦著不必傳進所有欽安殿首領太

監等應用之道衣法器經卷著派敬徵率同總管太監劉進禮前往查明圓明園佛樓等處首領太監等應用經卷法器著派裕誠率同總管太監趙喜查明開單具奏嗣後每屆欽安殿 天穹寶殿斗壇及圓明園佛樓等處拜斗拈香日期著敬事房圓明園司房先期請旨並著總管太監等傳諭各該處首領太監此後照常供獻上香敬謹灑掃著爲令○林則徐等奏英人前次先放火礮旋經剴諭仍向結兵船潛圖報復此次吐嚙洋船復首先開放火礮又占據官涌地方接仗六次我兵連獲勝仗並將尖沙嘴洋船全數逐出外洋請將該國貿易停止所有該國船隻盡行驅逐不必取具甘結並出示曉諭各國列狀宣布各國照常恭順仍准通商儻包庇潛帶入口一經查出從重治罪從之○以廣東水師提督關天培奮勇直前身先士卒賞給法福靈阿巴圖魯名號交部

優敘○癸卯移湖北崇陽汎把總駐江夏江夏汎外委駐崇陽○

甲辰安徽巡撫卞星額卒贈太子太保○以程楙采爲安徽巡

撫邵甲名爲安徽布政使調徐寶森爲山東按察使以文麟爲安

徽按察使

由江蘇淮
海道遷

○甲寅諭朕弟惇恪親王於上年薨逝迄今

十二月初四日已屆周年之期眷懷同氣良用愴然著御膳房豫

備祭品一桌派惠親王縣愉屆期前往代朕奠醢○乙卯諭前降

旨令八旗兵丁射箭俱穿用布衣布褲並因引見八旗兩翼官兵

仍穿紬段將該管大臣傳旨申飭自降旨以後各旗營引見六品

以下旗員均能恪遵諭旨連日兵部帶領引見王公護衛各員亦

無穿羽絨段之人甚合朕崇實黜浮之意惟本日貝勒縣馨門上

護軍校四人竟有三人仍穿紬段本應嚴懲示儆姑念縣馨見值

臥病在家著加恩暫行寬免嗣後六品以下旗員仍當慎遵前旨

穿用布衣布鞋如再有穿用紬段者除將本身斥革外必將該管大臣嚴行懲處○是月給江西德化等七縣山西應州等四州縣災民口糧蠲免江西南昌等二十三縣山西應州等八州縣直隸安州等五州縣被災新舊額賦緩徵江蘇高郵等六十州廳縣並淮安等七衛浙江烏程等四縣甘肅河州等十九州廳縣水旱霜雹災陝西綏德等四州縣積歉額賦兩淮富安等十四場新舊寬課展緩齊齊哈爾等處逋賦

十二月癸亥朔署兩江總督陳鑾卒贈太子少保賜祭葬如總督例賞其子慶涵舉人○調鄧廷楨爲兩江總督林則徐爲兩廣總

督○以裕謙爲江蘇巡撫調邵甲名爲江蘇布政使以管通羣爲

安徽布政使劉體重爲江西按察使

由河南彰衛懷道遷

○甲子允林則徐

奏移高廉道暫駐澳門查辦夷務○庚午諭軍機大臣等據琦璣

奏管庫司員隱匿公文侵吞帑項一摺已明降諭旨派文蔚馳驛

前往會同查辦矣此案慶玉將總理工程處印文藏匿八月之久

長領銀兩造入開除項下又私自收受遵化州批解租銀並另片

奏訪聞該員種種不法情事殊屬可惡管理籌備庫四品銜郎中

慶玉著卽革職拏問派琦琛親赴該員家內嚴密查鈔毋許走漏

風聲致有藏匿寄頓所有扶同徇隱之郎中明吉員外郎色欽魁

安著俟文蔚到時會同審訊該總兵自請察議之處俟定案時再

降諭旨○乙亥調黃爵滋爲刑部右侍郎以毛式郇爲禮部右侍

郎由左副都御史遷○丙子諭軍機大臣等據琦琛奏查出收留寄頓慶

玉財物一摺此案已革郎中慶玉於未經查鈔之先將財物寄頓

各處經該總兵出示曉諭卽據翼長西林等呈出寄頓物件翼長

西林內管領廣運文志章京富勒歡麗溥收留慶玉寄頓自有應

得之咎但既經呈出尙知畏法著免其革職無庸查鈔仍解任交文蔚會同琦琛嚴訊確情毋許不實不盡其收留慶玉寄頓各家如果始終代爲隱匿一經查出自當從嚴辦理該侍郎惟應確切根究按例懲治至慶玉之子副內管領魁明伊孫主事恒齡伊姪員外郎恒安著一併革職並生員孫縉及家人車夫等俱著歸案嚴訊○戊寅撥直隸盤山汛千總一黃崖關外委二駐青山嶺作爲專汛○己卯調伊里布爲兩江總督鄧廷楨爲雲貴總督○壬午諭軍機大臣等本日據琦善奏籌議水田情形覽奏已悉北直水田之利自雍正年間辦理以後迄今百有餘年規制率多更變著琦善於來春校閱營伍之便察看經過地方實在情形分別覈辦並著布政使陸費瓌俟明歲春融親歷各該處周稽博採如有可作水田之地確切查明具奏候旨辦理此事原期經久盡善不

在同時全行興辦要使得一頃卽有一頃之益得一畝卽有一畝之益行之以漸持之以恒於國計民生實有裨益○癸未命刑部尙書隆文在軍機大臣上行走○甲申諭軍機大臣等據御史杜彥士奏英吉利攜帶鴉片煙土在閩省海口銷售已非一日見當廣東查辦喫緊之時福建係接壤之區必當一律嚴辦聞漳泉各處有洋船往來寄泊水師員弁收受陋規營弁包庇販賣與奸民勾串洋人接濟水米水師哨船代爲交易運送鴉片各處銷售各等語鴉片見當嚴禁廣東不能容留必致轉趨福建若不一體嚴辦則來源未絕紋銀仍不能不出洋且由閩省侵灌各省在所不免見已降旨派祁寯藻黃爵滋馳往福建查辦並將鄧廷楨調任閩浙總督鄧廷楨著會同祁寯藻黃爵滋將以上各款查明懲辦毋許稍有徇隱○調鄧廷楨爲閩浙總督桂良爲雲貴總督○乙

西諭前因查辦慶玉一案究出送信根由係戶部主事全孚牽涉工部尙書陳官俊當降旨分別訊究朕於此案並不計其隱匿寄頓之多寡惟須究出送信之人從嚴懲辦本日據載銓等將陳官俊告知具奏而陳官俊則過涉枝梧以情理而論言者或出無心聽者早已有意卽令陳官俊偶有不檢撫拾空言亦不至遽罹重譴何以親具供詞竟無一語著實朕綜理庶政一秉大公在廷大臣無不相待以禮今遇此等案件既有旨訊問自當據實供明朕亦斷不疑陳官俊與慶玉有私故爲送信著陳官俊再行據實具供毋得稍形影響儻經此次訓諭之後仍復含混飾詞必將該尙書革職嚴訊勿謂朕薄待大臣也○丙戌諭軍機大臣等文蔚奏會審案件牽涉大員請旨審訊一摺已降諭旨將琦琛解任並將全案解京派載銓等嚴行訊究矣此案前據琦琛查鈔慶玉家產

究出官員差役收留寄頓情弊降旨令文蔚會同琦琛確切根究
見在琦琛業已解任著文蔚將已經查出物件檢明封固開單呈
覽此外有無收留寄頓之處著文蔚嚴切查明據實具奏如有不
實不盡日後別經發覺惟文蔚是問○命戶部侍郎文慶無庸在
軍機大臣上行走○丁亥申諭東南兩河撙節經費○戊子諭查
辦慶玉各款與陳官俊原不相涉惟陳官俊傳詢全孚時稽覈經
手工程不應以臆揣之詞提出難免動家字樣以致全孚藉端送
信指虛爲實已屬失於檢點至降旨飭令明白回奏並解任取供
兩次所陳俱含混隱飾及至嚴旨切責始行供明殊失大臣之體
陳官俊著照部議革職全孚係陳官俊隨帶辦工之員輒因詢問
工程遂將陳官俊疑似之詞爲成誼家屬通信先事豫防實屬有
心漏洩全孚亦著照議發往軍臺效力贖罪以示懲儆○以廖鴻

荃爲工部尙書祁雋藻爲左都御史沈岐爲吏部右侍郎轉毛式
卬爲禮部左侍郎以馮芝爲禮部右侍郎由內閣學士遷○是月緩徵江
蘇橫浦場山東海豐霑化二縣暨鹽場竈地額賦○是歲朝鮮琉
球入貢○會計天下民穀數除湖南福建二省暨臺灣府屬淡防
等七廳縣未經咨報外各省通共大小男婦四萬一千八十五萬
六百三十九名口各省通共存倉米穀三千一百六十一萬五千
四百石一斗一升五合

東華續錄

道光四十一年

臣王先謙敬編

臣周瀚蕃恭校

道光二十年庚子春正月壬辰朔加王鼎太子太保○丁酉上

奉皇太后臨視皇后疾○戊戌以阿勒清阿爲熱河都統調

德誠爲刑部右侍郎以惟勤爲盛京刑部侍郎由左副都御史遷○巳亥

諭昨因理藩院禁止哲布尊丹巴呼圖克圖設用旗纛並未奏明

嗣經該呼圖克圖呈出乾隆年間案據該堂官等又未具奏當降

旨將該衙門堂司各官交部嚴議茲據該部奏擬革職實屬咎所

應得奕紀著革去御前大臣戶部尚書總管內務府大臣並革去

紫纓毋庸管理藩院事務姑從寬加恩仍留都統賽尙阿著革去

都統從寬降爲二品頂帶奕紀賽尙阿吉倫泰文德和均帶革職

東華續錄

道光四十一年

一

留任處分八年無過方准開復郎中惠麟著照部議革職○調隆
文爲戶部尙書以鐵麟署刑部尙書

由左都御史兼署

○壬寅丑刻 皇

后崩

上親臨視辰刻奉

皇太后臨奠○諭

皇后正位中宮

先後事朕多年恭儉柔嘉壹儀足式竊冀侍奉

慈幃藉資內佐

遽爾長逝痛何可言著派惠親王縣愉總管內務府大臣裕誠禮

部尙書奎照工部尙書廖鴻荃總理喪儀○癸卯 上詣澹懷堂

大行皇后梓宮前奠酒至巳酉皆如之○丙午諭前據已革郎

中慶玉於被參後供出琦琛收受銀米馬匹當將琦琛解任交王

大臣等歸案質訊茲據載銓等呈遞琦琛親供已據供認不諱解

任馬蘭鎮總兵兼總管內務府大臣琦琛以二品大員收受屬員

餽送本應治以應得之罪惟慶玉係積年巨蠹經該總兵列款參

奏見經訊明各款均已得實琦琛著革職從寬免其治罪○戊申

上奉 皇太后詣澹懷堂

大行皇后梓宮前臨奠○諭 皇

后鈕祜祿氏德秉安貞禮彰雖肅珩璜協度夙嫺九御之儀禕翟流徽早攝六宮之事溯 萱殿祝釐之日 玉旨恭承迨椒庭作

配之年璇儀益茂順昭四德偕侍膳以承 歡勤贊萬幾佐求衣

而警旦遠紹練裳之儉蘭館垂型廣推樛木之仁蘭軒毓秀綜地

道而成妻道厚德應乎坤元自宮中以達府中芳譽傳其異順茲

於道光二十年正月十一日崩逝睽徽音之不著咸仰遺規宜燉

諡之崇加式昭懋典念自入宮伊始卽肇錫以嘉名迄乎正位以

來洵克符乎實行奉 慈幃而成順孝秉淑德而著醇全惟孝全

二字之微稱駭 皇后一生之懿範應卽諡爲 孝全皇后所有

應行典禮該部照例奏聞○諭向來察木多帕克巴拉呼圖克圖

每逾三年遣使進貢一次惟念察木多地方距京程途較遠嗣後

著加恩改爲閒五年一次卽自道光十九年爲始至二十五年再行遣使進貢以後照此遞推用示體恤○四川提督齊慎奏督辦馬邊廳等處邊防將新舊兵勇嚴定賞罰章程逐日訓練數月以來咸知奮勉一洗從前惰怯積弊得旨果如是無怪乎從前愈辦愈壞也○已酉林則徐奏英吉利國王遣義士登願來粵係因義律所爲不合換人經理請一併堅拒勿與通商從之○林則徐奏遵旨籌議御史駱秉章奏請整飭洋務章程一新例嚴禁煙土如查有夾帶分毫卽將該外國商人及保辦之洋商一併斥革治罪並訪查洋商如尙有朋充負欠者輕則革退重則治罪一查外國語有孖鴉名目卽華言所謂買賣人也漢奸卽在其內以致暗地勾通見飭洋商令通事買辦等逐層擔保如有營私舞弊者惟保人是問一見在停止英國貿易所有英人不准一名住省其各國

貿易良夷亦勒令遵例依期回國酌留一二人住冬仍防閑出入
不准與內地人民交接一前因三板船向無定額於十八年十一
月設立順字三板七隻見議將此項三板一併裁撤給米利堅等
國護照二張凡外國人進省及寄信往來均令另雇民艇赴各礮
臺隘口驗明方准內駛一外國人帶來洋銀務令以銀準貨不使
餘賸帶回下軍機大臣議從之○庚戌 上詣澹懷堂 孝全皇
后梓宮前行殷奠禮○壬子 上詣澹懷堂 孝全皇后梓宮前
行初祭禮○癸丑巳刻 上詣澹懷堂 孝全皇后梓宮前行啓
奠禮申刻奉 皇太后臨奠○甲寅 上詣澹懷堂 孝全皇后
梓宮前奠酒釋服○移 孝全皇后梓宮於觀德殿○原任廣東
巡撫朱桂楨卒賜其子鎮舉人○丁巳諭三載考績激揚是重滿
漢諸臣有能公勤任事實力實心者必當甄敘年老而精力並不

衰頹者仍應留任茲當京察之歲該部將京外諸臣開單題奏朕一一詳覈大學士穆彰阿潘世恩王鼎矢慎矢公贊襄攸賴刑部尙書祁項執法精詳奉公敬慎大學士直隸總督琦善坐鎮畿疆克副委任協辦大學士兩江總督伊里布久任雲南邊防靜謐江南河道總督麟慶河東河道總督栗毓美慎厥修防安瀾奏績俱著加恩交部議敘餘著照舊供職○戊午命 皇四子詣觀德殿

孝全皇后梓宮前行大祭禮○庚申諭此案已革都統奕紀以一品大員管理藩院事務撫綏外藩係其專責乃於沙布朗代送銀物並不正言拒絕輒取回收存至八日之久方始退還厥咎較重奕紀著發往黑龍江充當苦差以示懲儆已革理藩院郎中惠麟係承辦司員輒於書吏詐贓知情徇隱並聽許收受外藩銀兩情節亦重著發往烏魯木齊效力贖罪理藩院堂官雖訊無收

受餽送情事惟各有失察之咎並於京察時將惠麟保列一等著
交部查取職名嚴加議處尋議上尙書賽尙阿侍郎吉倫泰文德
和均請革職得旨均著加恩降爲三品頂帶仍帶革職留任八年
無過方准開復○辛酉諭皇子百日後常服挂朝珠王公大臣二
十七日後常服○是月展賑安徽泗州等七州縣衛災民給江蘇
邳州等五州縣衛安徽泗州等十六州縣衛災歛口糧貸江西德
化等十縣山西忻州等十州縣陝西葭州等五州縣湖南華容武
陵二縣甘肅秦州等六州縣倉穀口糧籽種緩徵山東濟甯等二
十州縣衛災民額賦展緩直隸滄州等二十九州縣江蘇高郵等
三十一州縣逋賦

二月壬戌朔日有食之○癸亥以阿勒清阿爲刑部尙書

由熱河都統遷

○丁卯戶部尙書何淩漢卒贈太子太保予祭葬諡文安○調卓

秉恬爲戶部尙書以邢窩藻爲兵部尙書沈岐爲左都御史調潘

錫恩爲吏部右侍郎

由兵部調

○戊辰諭此案已革郎中慶玉承修工

程並不遵照原估開設運料門口輒用地車載運重石致

神路

輒有轍迹碰損門框其房地建造亦多違式僭越又將同乾樹株

掉換木植應行存貯公所印文稿件攜回家內任意積壓其歷次

承辦鑲金活計雖未貽誤要工惟將領到官金陸續積存至二百

兩之多種種把持盤踞貪黷營私情節甚爲可惡慶玉著發往伊

犁充當苦差年逾七十不准收贖已革內管領魁明身任職官違

例吸食鴉片著發往烏魯木齊充當苦差○己巳以魏元煥爲兵

部右侍郎

由大理寺卿遷

○壬申

上詣觀德殿 孝全皇后梓宮前行

周月祭禮○甲戌以故克勤恪郡王承碩子慶惠襲爵○丙子慶

祿以病免以李象鵬爲貴州布政使文倫爲貴州按察使

由山東鹽運使

遷

○丁丑諭翰林院侍讀侍講詹事府洗馬中允贊善等官京察列爲一等者向例並無加級與別項一等人員殊不畫一自此次爲始京察一等之翰林院詹事府等官均著准其一等加一級著爲令○以祈禱靈應封浙江慈谿縣古靈山神漢驃騎將軍張意暨其子齊芳爲廣顯侯○壬午諭前後藏堪布入都進貢每年於新正呈遞丹書克豫於上年臘月抵都此次據理藩院奏稱前藏堪布羅桑敬邁等於正月十五日到京已令於三月初一日呈遞丹書克矣因念該處距京萬里之遙自因山川阻隔雨雪載塗以致行程不能預定若仍令其每年輪班入貢恐屆時急於趲程跋涉開關更增勞勩殊非優體喇嘛之意所有前藏堪布業已來京其後藏著於道光二十二年入貢輪至二十五年前藏再行入貢此後每開二年入貢一次以次遞推用示恩施格外體恤優加至

意○癸未以德興爲馬蘭鎮總兵官調德春爲倉場侍郎以端華

爲兵部右侍郎

由內閣學士遷

○甲申諭嗣後傳習天主教人犯於赴官

首明出教及被獲到官情願出教俱著遵照嘉慶年間諭旨將該犯等家內起出素所供奉之十字木架令其跨越果係欣然試跨方准免罪釋放如免罪之後復犯習教除犯該死罪外餘俱於應得本罪上加一等治罪已至遭罪無可復加者卽在犯事地方用重枷枷號三箇月滿日再行發遣該部卽纂入則例永遠遵行○以德厚祝慶蕃俱爲左副都御史

德厚由詹事祝慶蕃由太常寺卿遷

○河東河道

總督栗毓美卒贈太子太保予祭葬諡恭勤賞其子耀進士○以

文冲爲河東河道總督林紱爲湖北按察使

由山東運河道遷

○乙酉諭

楊國楨奏查拏鴉片情形一摺據奏在官人役及官親幕友長隨人等託足公門勢必互相容隱巧爲彌縫請變通新例准軍民人

等告發等語上年新定章程止准官弁訪拏不許旁人訐告原以杜挾嫌誣控之弊凡在官人役及官親幕友長隨人等自應責成本管官隨時查察遇有犯案嚴究有無徇隱縱庇情弊分別參辦若准軍民告發不但仍啓挾嫌誣控諸弊且恐在官人役勾串徇隱或至化有爲無以實作虛犯法者仍致漏網首告者轉懼反坐種種弊端在所不免該撫惟當督率所屬破除積習法行自近有犯必懲務令衙署肅清以冀愚民觀感所請軍民告發之處格礙難行著毋庸議○己丑 上詣觀德殿 孝全皇后梓宮前奠酒

○是月給安徽桐城縣貧民口糧貸山西河保等營兵丁穀石

三月丙申吳文鎔奏福建大墜梅林等洋面於上年十月閒有外國船隻停泊經提督帶領水師驅逐用礮火攻擊該船抵拒致傷兵丁見已轟擊逃散命鄧廷楨等飭屬防禦相機擊逐嚴查奸民

句結銷運之弊○丁酉諭軍機大臣等見在英吉利國貿易業經降旨停止所有粵海關每年例進貢物三次呢羽鐘表等件如有不能齊全之處著該監督卽行據實具奏不必多方購求尋豫塋奏呢羽等物出自佛蘭西等國者亦堪服用該國僉謂可以多製貨物來粵貿易英吉利貨物無可居奇得旨見在雖能照舊承辦設或日久有變動之處仍應遵奉本年諭旨不必設法購求以副朕務事覈實之意此批摺著入於交代並著督署存記○林則徐等奏英人船隻被逐逗留督飭武弁裝駕火船由長沙灣前進將近洋船寄碇處驟用火攻燬船二十餘隻並拏獲漢奸嚴訊定擬具奏○林則徐奏澳門寄居西洋人歷三百年之久自嘉慶十三年間英人突占澳門礮臺旋被官兵驅逐西洋人始有戒心見因西洋夷人稟稱澳內華夷雜處若兵役圍拏恐致擾動特限以日

期驅逐淨盡若過期尙未妥辦卽暫停西洋貿易以示操縱之意
得旨從長計議務出萬全又奏謝賞福壽字廳鹿恩批願卿福壽
日增永爲國家宣力也又奏廣東水師提督關天培於洋務極力
講求見在籌議剿捕之際請緩陞見批必當先其所急可奏請時
再行奏來○己亥以王藻爲湖南布政使王允中爲湖南按察使

由直隸天
津道遷

○庚子以恩華爲內閣學士兼禮部侍郎銜

由乾清門
侍衛遷

○辛丑

上詣觀德殿

孝全皇后梓宮前行二周月祭禮○己

酉諭邵廷楨暫駐泉州辦理海防○以賈楨爲內閣學士兼禮部

侍郎銜

由少詹
事遷

○辛亥湖北提督羅思舉卒贈太子太保賞銀三

百兩卹喪予祭葬諡壯勇○是月貸山西吉州等九州廳縣倉穀
緩徵山西代州等四十四州廳縣逋穀陝西神木府谷二縣旱災
額賦

夏四月壬戌冊諡 孝全皇后禮成頒詔天下○丙寅起陳官俊

爲通政使○丁卯以成世瑄爲江甯布政使張祥河爲河南按察

使服閱按

○戊辰以續齡爲左副都御史由大理寺卿遷○辛未命 皇

四子詣觀德殿 孝全皇后梓宮前行三周月祭禮○乙亥鄂廷

楨奏洋船駛至閩洋梅林澳寄泊署水師提督程恩高陸路提督

余步雲率將領弁兵兩路夾攻窮追遠遁予程恩高余步雲議敘

○己卯 上詣觀德殿 孝全皇后梓宮前行百日祭禮○壬午

吳榮光年老休致以瑞元爲福建布政使陳嘉樹爲山西按察使

由廣東鹽運使遷

○乙酉賜李承霖等一百八十人進士及第出身有差

○熊常緯以病免以梁寶常爲廣東布政使李星沅爲陝西按察

使由河南糧

○改廣東澄海協副將爲大鵬協副將駐大鵬九龍

山澄海協都司爲大鵬協中軍都司兼管左營駐大鵬所城大鵬

營參將爲澄海營參將駐澄海協大鵬左營守備爲澄海中軍左營守備駐縣城澄海左營守備爲左營左軍分防守備仍駐蓬州均作爲外海水師題補缺添設大鵬左營把總外委額外外委各二左營千總把總各一外委額外外委各二撥把總二分防右營官涌及九龍山礮臺移九龍山礮臺千總並新設額外外委各一防左營尖沙嘴礮臺外委一防紅鑪汛○戊子 上詣 廣潤祠祈雨○是月貸直隸紫荊關及所屬浮圖峪等三營弁兵倉穀緩徵山東汶上魚臺二縣水災新舊額賦

五月戊戌雨○己亥諭各省藩臬運司道府出缺不得以隔品及

試用人員濫行署理○癸卯楊振麟以病免以陶廷杰爲陝西布

政使岳鎮南爲甘肅按察使由浙江鹽運使遷○丁未以朱士達爲四川

按察使

由雲南池東道遷

○丙辰賞還賽尙阿一品頂帶吉倫泰文德和

二品頂帶○是月緩徵山東德州等二十四州縣衛江蘇邳州等七州縣災民新舊額賦

六月辛酉鄧廷楨等奏洋船來至閩洋圖銷鴉片奸民勾通販運隨地蔓延督飭員弁分路攻擊洋人受傷落水無算生擒二人並邀截漢奸船隻人煙並獲○丁卯以色列克精額爲綏遠城將軍轉關聖保爲禮部左侍郎調薩迎阿爲禮部右侍郎惟勤爲盛京戶部侍郎柏葰爲盛京刑部侍郎以德厚爲盛京工部侍郎由左副都御史○戊辰以季芝昌爲內閣學士兼禮部侍郎銜由詹事○己巳已革協辦大學士英和卒賞三品卿銜○辛未添設雲南邱北縣知

縣裁恩樂縣知縣移師宗縣訓導爲邱北縣訓導恩樂縣典史爲邱北縣典史改鎮沅直隸州知州爲鎮沅直隸廳同知駐恩樂縣改邱北縣丞爲鎮沅廳分防經歷鎮沅學正爲教授吏目爲司獄

恩樂縣教諭爲鎮沅復設訓導移臨安府捕盜同知駐阿迷州雙水塘改開化鎮屬石榴紅汛爲營阿迷州屬雙水塘爲汛移開化鎮右營都司千總把總各一外委二額外外委一駐石榴紅營臨元鎮千總一駐雙水汛添設廣西州屬賦草竜汛移廣西州營把總外委各一駐守移臨元鎮右營都司把總外委各一及蒙自縣屬簸巖汛外委一駐蒙自縣城仍撥簸巖營守備歸臨元鎮右營留外委一駐簸巖汛改蒙自縣屬二塘爲汛移縣城把總一駐守改阿迷州屬大小石牙隸文山縣歸開化鎮轄○丁丑林則徐等奏查英吉利近日來船兵械較多仍載鴉片在彼總欲愚弄漢奸阻撓禁令臣等前次燒船二十三隻後仍嚴飭水陸文武嚴拏懲創以洋船最畏焚燒函商水師提臣關天培等分帶兵勇暗伏梟澳於五月初九日夜將火船移近洋船聚泊處所先後燒毀載煙

洋船一隻大小辦艇十一隻近岸蓬寮九座其衝突竄逃各船彼此撞碰叫喊不絕燒斃溺斃及被煙毒迷斃者不計其數我兵並無被害○庚辰諭烏爾恭額奏洋船駛入浙江定海縣登岸滋事情形一摺前因查禁鴉片煙廣東省已斷絕貿易疊經降旨令沿海各督撫嚴加防範何竟毫無准備形同木偶致令登岸滋事烏爾恭額祝廷彪均著先行交部嚴加議處○命福建提督余步雲馳赴浙江會辦洋務○甲申諭烏爾恭額等由驛馳奏定海縣失守見籌堵禦一摺官兵遇寇自應出奇制勝謀定後動迺該總兵張朝發悞諫撤守以致喪師失城情罪重大遊擊羅建功等於敗後旋即回鎮亦復罪有應得定海鎮總兵張朝發署中營遊擊羅建功護左營遊擊錢炳煥護右營遊擊王萬年署中營守備龔配道均著革職拏問交部分別定罪烏爾恭額祝廷彪籌備不力前

降旨交部嚴議茲據該部奏請革職尙不足以蔽辜惟見當防堵之時若予罷斥治罪轉得置身事外烏爾恭額祝廷彪著先行革職暫留本任戴罪圖功以觀後效署定海縣知縣姚懷祥典史全福不屈投水被害身死實屬可憫著該部加等議卹○命鄧廷楨選派閩省大員帶領舟師赴浙會剿○戊子添設盛京總旗族長二○以瑚松額爲熱河都統訥爾經額爲陝甘總督

由熱河都統遷

東華續錄

道光四十二

臣王先謙敬編

臣周澗蕃恭校

秋七月庚寅以隆勛爲左副都御史

由通政使遷

○癸巳乍浦副都統

長喜奏洋船一隻直偪乍浦海口諭奇明保派兵策應防堵○甲

午諭前據御史焦友麟條奏部員壅滯亟宜整飭疏通一摺當交

軍機大臣會同吏部議奏茲據穆彰阿等詳議具奏嗣後外任改

補京職人員如奉旨指明何衙門員缺補用者著令其先赴該衙

門行走准其遇有選缺出時先儘補用毋庸兼補題缺○鄧廷楨

奏英國兵船駛進廈港稱欲求和經該文武阻斥不許上岸該船

換旗開礮直撲礮臺船頭一人甘語嫚詞守備陳光福放箭射斃

兵丁連放烏槍擊中二人落海護參將陳勝元執矛刺中一人身

死哨船及岸上弁兵槍礮聯絡中傷甚多予在事出力人員獎敘有差○丙申諭烏爾恭額以封疆大吏事前既無準備臨事不合機宜且該撫奏報後朕心方深廑注乃相距已及半月摺件仍照常由驛馳遞實屬督率無能糊塗不曉事體著卽革職仍令隨營效力贖罪浙江巡撫著劉韻珂補授劉韻珂接奉此旨卽著馳驛迅赴新任無庸來京請訓其未到任以前著鄧廷楨兼署○賞已革閩浙總督鍾祥三品頂帶爲四川布政使○丁酉諭軍機大臣等昨經降旨飭令鄧廷楨余步雲先後馳赴浙江勦辦本日據鄧廷楨奏定海被圍情形並福建廈門尙須嚴密防堵前月定海失守該督此時諒已得信接奉諭旨自必兼程前往惟閩省海口歧出處處均關緊要余步雲接奉前旨諒已帶兵赴浙陳階平又復賞假醫治若鄧廷楨再離閩省恐不足以資彈壓本日已降旨頒

發欽差大臣關防令伊里布赴浙勦辦浙江巡撫派宋其沅護理
鄧廷楨著無庸前往如已起身仍卽折回督率將弁認真防堵○
命伊里布爲欽差大臣赴浙江查辦事件以裕謙署兩江總督○
己亥奇明保奏乍浦海口洋船被擊後退竄外洋見已哨探無蹤
○庚子諭軍機大臣等此次英吉利沿海內犯攻陷定海致寇根
由傳聞各異有云絕其貿易有云燒其鴉片究竟起釁實情未能
確切著伊里布於到浙後密行查訪得其實據該大臣由協辦大
學士雲貴總督調任兩江今復授以欽差大臣關防專辦浙江軍
務受恩深重且於從前辦理並未涉手無所用其回護著悉心訪
察務得確情據實具奏○鄧廷楨奏定海失守後探聞洋人於城
內張榜招商銷售鴉片兵船二十餘隻聚泊港口內地師船恐難
驟近必須改造堅實大船多配兵丁礮火開道而進一擁登山命

伊里布到浙後相機妥辦○甲辰諭軍機大臣等本日據琦善由驛馳奏英吉利遞字訴屈見仍飭令在攔江沙停泊聽候奏奉諭旨遵行等語辦理甚爲妥協所有呈遞該督字據覽奏均悉惟既據稱尙有別項公文應須呈遞著琦善委員查問接收一併進呈仍飭不得妄越進口俟奏奉諭旨再行遵辦○丙午以江南貢院積水命鄉試展限一月武闈鄉試展至來年三月舉行○庚戌林則徐等奏續獲販煙人犯得旨外而斷絕通商並未斷絕內而查拏犯法亦不能淨無非空言搪塞不但終無實濟反生出許多波瀾思之曷勝憤懣看汝以何詞對朕也○癸丑烏爾恭額奏探明定海城內外到處防閑較前更密大頭目名伯麥次義律布耳利兩人近聞有一頭目已死尙未探有確名其兵船遊奕南至石浦北至乍浦分頭潛探未敢近岸卽駛至鎮海洋面旋停旋去亦不

敢近偏口岸見在浙江省各海口俱已列兵防堵○乙卯琦善奏連日查探洋船全行起碇自係前往山海關奉天等處節次派員前往屢與面晤據稱自廣東封港後所帶貨物資本賠累難支是以各處尋覓馬頭鎚而走險窺其詞色似有愧悔之心見既由臣接其字據卽由臣傳旨曉諭或冀取信臣惟待其回至天津隨機應變詳細開導令其返樞南旋○是月賑湖北沔陽等三州縣水災緩徵甘肅洮州等五廳縣地震災霜災通賦

八月甲子以邵甲名署江蘇巡撫

由布政使署

○庚午副都統裕瑞奏

瞭見洋船一隻相距老龍頭海口五里桅桿高大煙氣上衝係洋人探信所用並非兵船見在南駛仍帶兵加意巡防○丙子邵廷楨奏英吉利船二隻至福建廈門七月二十五日懸挂紅旗駛進青嶼直趨水操臺提督陳階平督令水師員弁開礮轟擊疊中船

尾並擊碎杉板一隻次日該船又駛向水操臺開礮副將靈德等放礮打中其船兩次旋即退出復放下杉板船隻尾追商船該遊擊謝國標追及偏進嶼仔尾山後小港開礮擊中洋人五名跌倒

在船旋即起旋遠去無蹤

○丁丑以縣性爲內閣學士兼禮部侍郎

銜輔國公

○已卯琦善奏英人船隻全行起旋南旋並稟稱沿海

各處如不開槍礮亦不敢生事端定海之兵亦可先撤一半上

命琦善爲欽差大臣赴廣東查辦並諭伊里布宋其沅裕謙邵甲

名托渾布邵廷楨林則徐等一體遵照防守要隘洋船經過或停

泊外洋不必開放槍礮○調訥爾經額署直隸總督以瑚松額署

陝甘總督

由熱河都統署

○以玉明爲內閣學士兼禮部侍郎銜

由御前侍衛遷

○庚辰諭浙江各督撫緩輯沿海居民勿令驚擾○辛巳署兩江

總督裕謙奏英人呈遞書字語句狂悖本不敢據以上聞因前次

奉有諭旨不敢不代爲具奏得旨所見大差遠不如琦善之遵旨
曉事原字原書一併封奏使朕得辨別真僞相機辦理若似汝之
顧小節而昧大體必致債事殷鑒具在不料汝竟效前明誤國庸
佞之所爲視朕爲何如主耶試思我朝之所以興開國時一切情
僞無不上達之故前明之所以亡事無巨細率皆壅蔽故國事日
非措置失宜可不懷之又懷在汝亦不值朕發此議論遇事觸懷
信筆而作○是月給江蘇上元等十四縣水災口糧並修屋費

九月庚寅諭前因鴉片煙流毒海內特派林則徐馳往廣東海口
會同鄧廷楨查辦原期肅清內地斷絕來源隨地隨時妥爲辦理
乃自查辦以來內而奸民犯法不能淨盡外而興販來源並未斷
絕本年福建浙江江蘇山東直隸盛京等省紛紛徵調糜餉勞師
此皆林則徐等辦理不善之所致林則徐鄧廷楨著交部分別嚴

加議處林則徐卽行來京聽候部議兩廣總督著琦善署理琦善未到任以前著怡良暫行護理○辛卯托渾布奏洋船八隻已先撥船三隻由大洋南回見來船五隻亦由該省洋面開帆南駛情形極爲恭順命托渾布體察情形將前調防守各官兵酌量撤退歸伍以節糜費○召邵廷楨來京以顏伯黻爲閩浙總督張澧中爲雲南巡撫喬用遷爲山西布政使王庭蘭爲廣東按察使由山東鹽運使○甲午以常恒昌爲浙江布政使徐廣縉爲福建按察使由江西糧道遷○乙未革林則徐邵廷楨職命赴廣東備查問差委○己亥諭軍機大臣等本日據伊里布馳奏勦辦防堵情形及探明進兵路徑覽奏均悉前派琦善馳赴廣東查辦會飛示伊里布等一體遵照此次伊里布督率兵勇將其船隻擊沈礮位搶獲並生擒多名自係在未經接奉廷寄之前見在該大臣業經接奉廷寄自必

相機妥辦該目所投回文於交地退兵之事並未覆及該大臣惟
當剴切曉諭告以爾等之來原爲訴冤乞恩起見前在定海係因
言語不通以致互相攻擊傷我文武各員此次我兵擒獲多人仍
仰體大皇帝中外一家之意優加養養未行傷害爾等果能迅速
退兵交還定海定將歷次所獲男婦剋日釋回天朝誠信待人斷
無欺誑之理該大臣如此曉諭一面密派明幹之人分頭偵探如
果確係退兵交地始可將擒獲之人全數交還至此次在事各員
弁兵勇著該大臣暫爲存記聽候諭旨○逮烏爾恭額下部治罪
○壬寅以奕山爲正白旗領侍衛內大臣在御前大臣上學習行
走○乙巳以王炳瀛爲內閣學士兼禮部侍郎銜由詹事遷○戊申
皇七子奕譞生○乙卯以蘇彰阿爲湖南按察使由甘肅鎮總兵遷○是
月給江蘇泰興縣水災口糧

冬十月辛酉賜趙雲鵬等七十一人武進士及第出身有差○
亥諭前據管通羣明白回奏稱伊父卸任時曾將記欠陋規兼養
廉湊足銀八千兩發商收領等語當降旨交訥爾經額等查明具
奏茲據奏稱提訊綱總朱敦復等並檢查運庫案卷交領銀數均
屬相符惟發銀諭帖及該商領狀但稱留補變抵不敷之用並未
指明此項銀兩係記欠陋規並養廉湊發該藩司原奏係以收存
陋規留爲分賠之用殊屬牽混管通羣著交部嚴加議處尋革職
○己巳以徐寶森爲安徽布政使王篤爲山東按察使由轉道遷○辛
未諭軍機大臣等本日據伊里布馳奏專弁前往定海一摺覽奏
已悉此次差弁前往定海與該目面見是否在定海城中抑在船
上原奏未經聲敘其定海居民見在是何景象該弁等既經前往
自必目擊情形著伊里布於接奉此旨後詳訊該弁據實奏聞至

所呈各物該大臣奏稱恐生疑貳收貯充賞等語甚屬非是著嚴行申飭天朝大臣斷無收受外夷餽獻之理見在收貯各項如未經充賞著卽全數發還仍善言曉諭告以天朝定制嚴禁苞苴並無厭憎拒絕之意至所稱繕發告示諭禁等語發至何處張貼著明白具奏○己卯諭朕因鴉片煙流毒中外傳染日深屢經降旨飭令地方官嚴行查辦上年頒發新定章程嚴立科條寬予期限務使吾民漸除惡習永絕根株惟自定例以來各省大吏奏報拏獲煙犯所在多有薄海內外必已父戒其子兄勉其弟咸知畏法自新誠恐愚民狃於積習尙存觀望冀倖之私卽日限期屆滿或以無知觸法朕甚憫焉著通諭各省將軍督撫等督飭所屬認真查拏至京師爲首善之區所有部旗文武大小各衙門尤當合力同心嚴查究辦若心存推諉試問盡職乎抑溺職乎斷不可因罪

名較重稍存姑息之心仍蹈養奸之習如果實力奉行不留餘孽
卽從前查辦不嚴原可寬其既往儻因規避處分仍前玩泄以致
錮習不除朕必不能輕恕是在內外滿漢諸臣訓諭督催不遺餘
力轉瞬限滿無一藐法干罪之人用副朕除惡務盡之意勉之望
之○壬午以 孝全皇后梓宮奉安龍泉峪陵寢 上詣觀德殿
行祖奠禮○癸未 孝全皇后梓宮啓行命 皇子奠酒行禮○
是月賑直隸滄州等三州縣災民給安徽東流含山二縣軍民口
糧貸奉天白旗堡小黑山水災口糧蠲緩直隸滄州等三十三州
縣湖北沔陽等八州縣衛水災新舊正雜額賦緩徵山東德州等
五十九州縣衛及東平所永阜場河南睢州等十七州縣江西南
昌等二十縣安徽壽州等四十九州縣衛水旱災歉新舊正雜賦
課盛京十里岡五屯被水站丁倉糧

十一月己丑

孝全皇后梓宮至龍泉峪奉安於

饗殿○庚寅

上啓鑒謁

西陵○免經過地方額賦十分之五○甲午上

謁

泰陵

泰東陵

昌陵並詣

孝穆皇后

孝愼皇后陵寢

奠酒

孝全皇后梓宮前行遷奠禮○乙未

孝全皇后梓宮奉

安地宮

上親臨視命

皇子行禮○

臨奠端順固倫公主園寢

○丙申以阿靈阿爲工部右侍郎

由內務府總管遷

○丁酉

上回鑾○

戊戌諭軍機大臣等本日據怡良奏撤防師船歸營猝被轟擊奪

去米艇兵丁一摺覽奏之下不勝駭異該夷在天津業經約定前

赴粵省靜候查辦並有沿海各處如不開礮渠亦斷不滋擾等語

且據怡良奏稱天津情形火輪船已爲傳說不得誘爲不知何以

遽行開礮天朝從不失信旣已相約戢兵且專派欽差大臣前往

查辦代爲昭雪何以於撤防兵船猝加轟擊是誠何心著琦善一

面詳加詰問要回擄去船隻一面嚴飭文武員弁密加防範毋許駛入內洋是爲至要○己亥 上還京師○辛丑諭余步雲奏請留浙江隨同防堵一摺所請甚是見在該提督雖無承辦要件而海口仍須防堵著俟定海收復後與欽差大臣伊里布一同奏明再回本任○伊里布奏英人起梃赴粵尙有留住定海之人惟恐兵船全撤伊等無可挾持是以仍將一半留住定海命伊里布隨時密探○湖廣總督周天爵奏違例用刑自請先行革任得旨著俟吳其濬等審明定案後再降諭旨又批嫉惡過嚴原當若是例外非刑有是理乎自古嚴明之吏未聞剗造非刑即使情真罪當已爲過舉若有不自於其閒於心忍乎於法平乎所謂猛以濟寬除惡務盡並非逞一時之忿專尙酷毒也○壬寅調岳鎮南爲直隸按察使以程德潤爲甘肅按察使服闋按察使○撤陝安漢中二鎮

派赴巴爾楚克換防兵丁二百名以巴爾楚克屯民募補並裁把
總一經制外委四○乙巳劉韻珂奏英吉利據守定海情形命於
武備事竣馳赴鎮海會同伊里布查辦○裁貴州長寨廳土把總
○戊申諭烏爾恭額以封疆大吏責在守土不能先事籌畫以致
定海倉卒失守復調度無方一籌莫展似此昏愎無能罪無可追
見據軍機大臣會同刑部遵旨議罪擬將該革員發往新疆充當
苦差尙不足以示懲儆烏爾恭額著改爲絞監候歸入明年朝審
情實已革署遊擊羅建功護遊擊錢炳煥王萬年業經罪坐主將
照原擬發往新疆充當苦差已革署守備龔配道業經革職應毋
庸議○吳文鎔奏琉球國遣使來閩籲請照舊開年進貢一招向
來琉球國開歲一貢上年降旨改爲四年遣使朝貢一次原所以
體恤外藩茲據該撫奏該國王遣使來閩請照舊開年進貢情辭

極爲真摯著如所請行所有該陪臣子弟四名准其隨同貢使北上入監讀書○壬子諭軍機大臣等本日據伊里布奏歷次夷情一摺朕前此准令琦善赴粵查辦欲因勢利導及早戢兵原係爲斯民謀久安長治之策澳門定海爲海疆要區安可聽其貿易此朕深慮熟籌早有定見者也見在琦善想已到粵如聽受訓諭則退還定海無俟勞師實爲上策儻竟不遵約束則琦善必據實奏聞另籌辦法統俟粵省奏到再示機宜各路調兵見已陸續歸伍而本地營兵爲數不少分隘散布巡察防堵全在加意整飭無稍疏虞該大臣片奏鑄礮六十餘位正可於閒時操演有準以期得力儻粵省查辦不能妥協其勢萬不能已彼時應調何處弁兵著伊里布一面檄調一面奏聞該大臣尤當先事綢繆計出萬全是爲至要儻籌辦疏懈將來有誤機宜朕惟伊里布是問○癸丑諭

吳其濬等奏審明委員非刑斃命及總督信用屬員濫刑滋擾各情一摺此案已革候補知縣楚鏞在督署審案擅用非刑酷訊斃命並因委辦鹽卡違例株連刑責並將繫桿人犯任意疊杖拖斃多命慘酷已極楚鏞著先在省城枷號兩箇月滿日發往烏魯木齊充當苦差湖廣總督周天爵舛造非刑信任楚鏞在署審案並派總管鹽卡於應歸地方官審辦之件違例專委訊辦以致恣行威福拖斃多命並將匪犯親自拍傷兩目成瞎種種妄爲見經欽差侍郎逐款訊出該督以一品大員輒逞一時之忿專尙酷毒實屬負恩任性周天爵著卽革職發往伊犁充當苦差其該督署內伺候扛轎夫頭永行禁革所置非刑卽著盡行銷毀並嚴禁問刑衙門效尤私設○以裕泰爲湖廣總督由湖南巡撫選○丙辰以吳其濬爲湖南巡撫調許乃普爲戶部左侍郎轉潘世恩爲吏部左侍郎

調王植爲吏部右侍郎轉黃爵滋爲刑部左侍郎以周之琦爲刑部右侍郎○是月賑江蘇上元等十六縣直隸天津縣水旱災貸江蘇江甯駐防及督協各營駐紮災區兵餉黑龍江墨爾根城水災屯丁口糧屋費蠲緩江蘇泰州等七十二州縣衛直隸天津縣山西河曲縣新舊額賦緩徵陝西葭州等十州縣甘肅金州等十九州廳縣山西岢嵐州被災新舊額賦兩淮丁谿等七場新舊額賦展緩黑龍江等四處及甯古塔三姓旗民站丁逋賦

十二月戊午琦善奏英人回粵詞氣傲慢情形諭軍機大臣等該大臣以水師參將出名代撰發給文稿仍於虎門密防所辦尙屬妥協著琦善詳加體察善議戢兵一面整飭營伍妥爲布置如實係恭順仍遵前旨查辦儘有必須勦辦之勢著卽一面奏聞一面相機辦理總之該大臣受國厚恩必當爲久遠之計至義律旣稱

患病回國而派人前往投文出艙面見並無病容是其別有肺腸已可概見著琦善訪探確情據實具奏○己未申諭沿海各將軍督撫嚴密海防○癸亥琦善奏粵省實在情形並節次奉旨飭查事件除廣州將軍阿精阿等奏團練水勇前督臣林則徐奏請鼓勵員弁俟事定再行議奏外一洋人索償煙價緣林則徐示令繳煙時節次諭文均有奏請賞犒獎勵字樣洋人頗存奢望迨後每煙一箱僅給茶葉五斤該洋人所得不及本銀百分之一而又勒具以後再販鴉片船貨入官人卽正法之甘結迄未遵依此費所由起也一硃筆點出林則徐奏躉船二萬餘箱係英國領事義律自行遞稟求收等語查義律遞稟距林則徐撤退買辦業已五日可見窘迫而然非出情願時義律僅止孤身設有黨援未必降心俯首一諭查英吉利國王給林則徐文書並無其事惟呂宋國王

會給林則徐文書或因此誤傳一硃筆點出林則徐奏言定海陰
溼洋人病死甚多等語咨詢伊里布據覆該洋人穀米牲畜尙充
疫癘病斃數百餘人多係兵丁舵工頭目死者不過數人又諭查
御史曹履泰奏粵東澳門傳有洋人私信等因從前洋人書信祇
言貿易官員向不過問自林則徐到粵欲悉洋情多方購求卽有
漁利之徒造作播傳真偽互見此時紛紛查探適墮術中所奏應
無庸議一諭查林則徐奏米利堅佛蘭西等國僉謂英船若不早
回伊國必遣船前來與之講理硃筆復點出林則徐另片各國因
英人阻其貿易氣憤不平等語訪問各國曾有此說並非林則徐
謊言然迄今未見兵船前來前有米利堅船二隻乘英人不備之
時進口至今未敢駛出情狀畏葸如斯縱力足頡頏恐未肯傷其
同類一硃筆點出林則徐奏虎門燒毀煙土時洋人觀者撰文數

千言紀事等語事誠有之但詞含譏刺並非心服一硃筆點出林則徐奏具結之後查驗他國來船絕無鴉片等語如指上年而言則事屬已往船貨無憑若指本年而言來船尙未進口盤查既不能知其有亦安能信其無奏入諭軍機大臣等本日據琦善奏查明粵省情形逐條詳覆並將各件呈覽一摺覽奏均悉又奏見在籌辦一摺匪特澳門等處緊要隘口不能准其貿易卽沿海各口岸何處非海疆重地著琦善一面與之論說一面妥爲豫備如桀驁難馴毋得示弱需用兵丁著一面飛調一面奏聞又諭本日據琦善奏查探夷情漸形迫切見在兵船日增駛進虎門其設心已可槩見等語從前命琦善查辦原係朕慎重用兵之意今所願甚奢其勢不得不加以創懲除諭令琦善隨時馳奏外著沿海各將軍督撫等仍遵前旨加意操練以期有備無患各省濱海地方港

漢紛歧著各酌量形勢分撥防兵嚴密布置毋得稍有疏虞自干重咎○丁卯以李鈞爲貴州按察使

服闋按察使

○戊辰諭軍機大臣

等本日據伊里布奏接准廣東來信相機籌辦一摺又另片奏見在密加守禦等語覽奏均悉該大臣旣探明夷船自粵回浙後情形與前不同並將船內礮械運岸排列該大臣將前擬撤退尙未起程各兵仍留浙省所見甚是如並無滋擾情事仍著嚴密防範勿任窺伺儻接到廣東知會必須用兵著遵前旨迅卽督令將弁分路進剿伊里布駐浙數月諒於進兵路徑及何處可以戰守一切情形均已熟悉所需槍礮船隻自必豫爲儲備著仍遵前旨熟籌妥協勿令坐失機宜○以鐵麟爲察哈爾都統恩桂爲左都御史

由吏部右侍郎遷

○調福建提督余步雲爲浙江提督○己巳諭前據

載銓等查訊舉人熊少牧跟隨文慶入闈閱文當降旨令文慶明

白回奏並著胡林翼將閩內如何閱卷據實具奏茲據該侍郎等各自具摺覆奏自請嚴議議處直省正副考官向不准帶人入閩閱卷此次文慶攜帶舉人熊少牧前往江南與之參論覆看甚屬非是文慶著交部嚴加議處編修胡林翼初次具摺覆奏於文慶攜帶熊少牧入閩一節未據聲明迫經降旨再令覆奏始以失察請議亦屬不合胡林翼著交部議處舉人熊少牧著交部照例治罪○調善燾爲吏部右侍郎麟魁爲戶部右侍郎柏葰爲刑部左侍郎由盛京刑部侍郎還○以王惟誠爲太僕寺卿程霨采爲廣西布政使

服闋布

○移直隸霸州營遊擊爲葛沽營遊擊葛沽營都司爲蘆

臺營都司永甯營守備駐霸州滴水崖千總駐永甯撥天津鎮把總經制外委各一駐北塘口宣化鎮經制外委一駐滴水崖○庚午諭軍機大臣等本日據琦善馳奏籌辦情形既非情理可諭卽

當大申捷伐所請廈門福州兩處通商及給還煙價銀兩均不准
行再或投遞字帖亦不准收受並不准遣人再向理諭見已調湖
南四川貴州兵馳赴廣東聽候調度著琦善督同林則徐鄧廷楨
妥爲辦理如奮勉出力卽行據實具奏並著琦善整飭兵威嚴申
紀律相機勦辦朕志已定斷無游移該大臣受國厚恩責任綦重
固不可失之冒昧尤不可少有畏葸務須計出萬全妥爲籌辦○
命訥爾經額赴天津防堵○調成剛爲盛京刑部侍郎以道慶爲
盛京兵部侍郎由內閣學士遷○調程喬采爲江蘇布政使邵甲名爲廣
西布政使○癸酉冊封靜貴妃博爾濟吉特氏爲 皇貴妃琳貴
人烏雅氏爲 琳嬪○諭科道有風聞言事之責內外官吏貪庸
不職原許列款糾參至賞罰大權操之自上豈容疏慙小臣妄行
干預前據給事中周春祺奏參浙江提督祝廷彪應行治罪等語

已屬非是至祝廷彪年逾七旬精力就衰恐其調遣不能得力是以降旨休致並不因該給事中奏參始有此諭本日又據周春祺具摺言事輒謂休致祝廷彪之旨係伊參奏所致竟似朝廷用舍賞罰大權言官可以意爲操縱若相率效尤成何政體此風斷不可長周春祺不勝給事中之任著回原衙門行走○甲戌諭從前京外大員兄弟子孫每屆五年查辦一次挑在侍衛拜唐阿上當差原以侍衛拜唐阿差使體面大員子弟一經挑取之後愈得熟習清語騎射自道光十六年查辦以來迄今將及五年又屆應行查辦之時惟念該大員子弟亦有不同或身軀軟弱馬上平常或自幼讀書不暇兼習馬步箭卽挑取侍衛拜唐阿又安望其得力宜量爲變通辦理嗣後在京文職三品以上武職二品以上在外文職自總督至按察使武職自將軍提督至總兵該大員兄弟子

孫內有及歲似與侍衛拜唐阿差使相宜值五年查辦之期情願送挑者該大臣等仍照上次報於本旗由該旗造冊咨送軍機處彙總具奏將朕指出者帶領引見儻身弱有疾或馬步箭平常不堪送挑者該大臣等卽據實報明該旗轉行軍機處聽其自便該旗亦無庸催取職名用示朕曲成器使旗僕至意○諭文慶經朕派充江南鄉試正考官理應嚴密關防盡心校閱輒敢私帶舉人熊少牧入閱幫同閱卷實屬違例著卽照部議革職副考官胡林翼與文慶同在內簾於熊少牧藏匿闈中豈竟毫無聞見既不據實奏參迨經降旨詢問又不據實回奏該部議以降調咎有應得著卽照部議降一級調用不准抵銷監臨官安徽巡撫程林采監試官江防同知周維新僅止失察著加恩改爲降二級留任不准抵銷○諭吳其濬等奏審明已革知縣稟許總督各情分別定擬

一摺此案湖廣總督周天爵前已降旨革職遣戍著無庸再議湖北巡撫伍長華於飭交嚴查之案未將應提人證到案質訊僅據周天爵咨覆結案殊屬阿附不職伍長華著與隨同審訊之布政使孫善寶按察使林紱均交部嚴加議處武昌府知府明峻於周天爵諭令查訊李毓華行賄一節見雖據實稟明惟於該撫飭查時未經明晰聲敘亦屬不合著交部察議尋議伍長華革職孫善寶林紱降四級調用明峻降一級留任從之○調文蔚爲戶部左侍郎以特登額爲工部左侍郎

出副都統遷

○乙亥調朱士達爲陝西

按察使李星沅爲四川按察使○丙子諭軍機大臣等本日據琦善奏籌辦情形一摺覽奏均悉前兩次由六百里諭知一切諒已欽遵辦理該大臣酌調各兵分別密防與朕意相合見在湖南四川貴州各兵想已陸續抵粵即可分布要隘乘機痛剿朕不爲遙

制切勿畏難苟安致失機宜所需軍費無論地丁關稅准該大臣酌量動用作正開銷儻有不敷迅卽奏聞請旨見在定海一帶早已飛諭伊里布等加意防守卽盛京等處各直省海口亦已妥爲防範該大臣斷不必慮及粵省攻剿過甚竄入他省朕所望者惟當計出萬全謀定後動其善體朕意毋忽○戊寅諭向來秋審朝審人犯緩決三次以上者人數積多每屆數年諭令刑部奏請分別減等以示法外之仁今自道光十八年查辦之後至本年緩決者又積有一萬一千四百餘名口著刑部將本年秋審朝審緩決三次以上各犯奏明分別減等○己卯調吳文鎔爲湖北巡撫以劉鴻翱爲福建巡撫調梁萼涵爲雲南布政使以郭文匯爲甘肅布政使寶清爲廣西按察使

由山東濟東
泰武臨道遷

由直隸通
永道遷○以徐璣爲湖北按察使

奏請
使遷

○辛巳諭軍機大臣等據伊里布馳奏請調各省官兵一摺已由六百里飛飭安徽湖北湖南照數調撥矣其前已飭回之文武各員除謝朝恩留浙彈壓外其林明瑞曾得勝黃冕孫逢堯陸獻封耀祖等均著准其調赴鎮海差遣委用本日又據裕謙奏審度制勝之謀一摺據奏定海之西境有魯名岑港爲定海全境第一險要之地應以精兵先據岑港再行分兵守險並言各省皆可議守浙江必應速戰等語所辦均不爲無見著伊里布體察情形按照摺內所指各條相機妥速辦理該大臣係朕特簡大員受恩深重必能公忠體國敵愾奏功斷不可稍存彼此之見致誤事機○壬午在籍前任浙江提督王得祿奏遵旨會同臺灣鎮道商辦海防事宜得旨嘉勉○起奕顥爲理藩院右侍郎○以瑞元爲烏什辦事大臣曾望顏爲福建布政使徐廣縉爲順天府府尹裕

康爲福建按察使

由浙江鹽運使遷

○癸未奕顥以重聽休致以慧成爲

理藩院右侍郎

由通政使署

○是月給福建龍谿南靖二縣水災口糧

屋費貸江蘇江陰等三營兵餉蠲緩浙江長興等四縣水旱災新

舊正雜額賦

○是歲朝鮮入貢○會計天下民穀數除福建湖南

未報外各省通共大小男婦四萬一千二百八十一萬四千八百

二十八名口各省通共存倉米穀三千二百三十六萬九千六百

二十五石六斗三升七合八勺